

Zeitschrift: Bündner Schulblatt = Bollettino scolastico grigione = Fegl scolastic grischun

Herausgeber: Lehrpersonen Graubünden

Band: 58 (1998-1999)

Heft: 3: Pädagogische Arbeitswoche in Trans : einmaliges Erlebnis für SchülerInnen des Giuvaulta

Artikel: Viil erläbt, glacha, gspiilt und glernt : Wochenüberblick aus der Sicht der Schülerinnen

Autor: [s.n.]

DOI: <https://doi.org/10.5169/seals-357329>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 09.10.2025

ETH-Bibliothek Zürich, E-Periodica, <https://www.e-periodica.ch>

Wochenüberblick aus der Sicht der SchülerInnen

Viil erläbt, glacha, gspiilt und glernt

Mäntig

Am Mäntig het z'Lager aagfanga. Miar hend üs in Giuvaulta am Morga besammelt. Bevor miar abfahra sind, hemmer in dr Turnhalle no vom Heim no üsara Film vom Zirkus Lollypop aagluagt. D'Seminarischta hend aaschlüssend no as Liad gsunga. Denn hemmer üsers Gepäck gfasst und sind in da Bus uf Trans iigschtiga. Doba in Trans hets gschneit. Zum Glück hemmer ina ins warma Lagerhuus ina go können und hend döt üsari Zimmer iigrichtet. Vor am Zmittag hemmer trotz am kalta Wetter no dia nöcher Umgebige vom Lagerhuus erkundet. Zum erschte Mol hemmer dr Zaubewald vo nöchem gseh. Wo miar zugg gsi sind, hets an feina Zmittag geh, nämlich Händöpfelstock und Gschnetzlets. Nach am Essa hend miar an gheimnisvolle Brief gfunda. Döt dri isch gschtanda, dass an bösa Zauberer drei vo da Leiter entfüert het. Zum Glück hend d'Leiter a Spur mit Sagmehl hinterloh. So hend miar gwusst, wo suacha. Gfunda hemmer dia drei unter ama Felsa versteckt. Sie sind ganz starr gsi und miar hend sie müassa mit ama Zauberspruch erläsa. Bim Stefan het leider kei Zauberspruch gholf, drum het d'Norina ihm a Hampfla Dreck ins Muul gworfa. Z'frida sind miar zugg zum Lagerhuus. Zum Znacht het üs d'Kuchimannschaft feini Spaghetti uuftischt. Denn, am halbi achti het d'Spiilolympiada aagfanga. Bis am nüüni hend miar viili Spiili usprobiert, nämlich Memory, Vier gewinnt, Uno, Mikado, Wer ist es?, Schwarza Peter, Ciao Sepp und Mix Max. Denn hend d'C1 Schüalar afang ins Bett müassa und am halbi zehni, nach ama strenga Tag, ischs denn au für dia grossa Ziit für ins Bett gsi.

Dsischtig

Am Morga hemmer selber törfa wähla, wo miar hend wella mitmacha. Ma het können singa, tanza, Theater spiila oder an dr Mini-Playback-Show oppis vormacha. Das

alles hend miar für d'obigvorstellig güabt. As isch uu luschtig gsi. Miar hend üs können verkleida und schminka. Am Nomittag simmer denn alli sehr sportlich gsi. Miar hend a Olympiada gmacht. In kliina Grüppli hend miar verschidani Pöschta können macha: Sackhüpfa, Büchschüssa, Kaugummidreha, Türm bauh, Seilzücha, Wasser träge und ping pong spiila. Am Obig hets denn as gsunds und sehr feins Birchermüasli geh. As hends zwar nit alli gera gha. Für as paar ischs scho wider zu gesund gsi. Denn het scho bald ds Obigprogramm aagfanga. Dr Pius Kalberer het moderiert. Alli hend ihri Produktiona vortreit. As isch wirklich super gsi. Zum Schluss sind denn no d'Backstreet Boys koh as Liad vorträga. Sie sind extra für üs us Amerika iigreist. Das isch wirklich an super Obig gsi. Aber as het fascht müassa so koh, mit ama so guat dekoriarta Saal.

Mittwoch

Nach am Zmorga hend miar aagfanga Steimännli baschtla. Miar hend uu viil Sacha us am Wald zur Verfügig gha: Stei, Holz, Blätter, Wurzla und Moos. Denn hets aber au no Farba, Wulla, Droht und Liim gha, zum as paar Sache fescht macha. Dia Männli sind uu schön worda. Zum Teil hends sogar no as Hüüsli kriagt und das



vom Andreas het no as Schiffli gha. Am Nomittag sind miar denn alli in Zaubewald go a Hütte bauh. Für dia hemmer natürlich au no müasse Holz sammle. Holz und grossi Stei hets denn au no für ds Lagerföör bruucht. As isch zwar uu schwirig gsi, trochas Holz z'finda wills jo dia ganz Nacht het gregnat gha. Miar hend aber gliich an rechta Huufa zemakriagt. Dia wo grad nüüt z'tua hend gha, hend probiert as Märli z'schriiba. Döt sind vorkoh: Dr David Hasselhoff, d'Pamela Anderson, d'Mamma Jost, dr Dagobert Duck und dr Leonardo di Caprio. Wo miar denn mit allem sind fertig gsii, ischs scho langsam Obig worda und miar hend alli Hunger kriagt. Do sind plötzlich as paar Leiter mit Cervelats und Bratwüsch, Händöpfelsalat und Gmüas uftaucht und miar sind alli grettet gsi. Miar hend üs uns warma Föör uma versammelt und niamert het meh hunger ung kalt gha. Nach am Znacht simmer denn zugg ins Lagerhuus go Tuscha und üs go ufwärma. Au in soma Lager muass ma halt a bitz su-





über sii. Was denn endlich dunkel gsi isch hemmer üs nomohl warm aagleit und hend a Fackellauf zur Hütta ufa gmacht. Dia Hütta isch so gross gsi, dass miar alli hend Platz gha und döt hend könnä üsers selbergmachta Märli aalosa. Wo das fertig gsi isch, hend miar am Wurzelmännli grüaft. Und luag do, as het üs Antwort geh. Zeigt het es sich üs allerdings nit. Wurzelmännli sind eba leider sehr schüch. Wo miar denn aber zrug in ds Lagerhuus gloffa sind hemmer denn ds Wurzelmännli nomohl lacha und schreia ghört. As isch scho as bitzli gruslig gsi. Gschloffä hend miar aber alli guat, nach soma aastrenganda Tag.

Donnschtig

Am Morga sind miar alli zema in Zauberswald zu üsara Hütte ganga. Döt hend miar Grüppli gmacht für ds Schmugglerspiili. Jedi Gruppa het müassa vo ihrem Baum Zettali in d'Hütta transportiara. Dia Zettali hend aber au könnä vo andarna Läufer gstohla werda. Wer am Schluss am meischtä gha het, het gwunna. Dia Zettali het ma denn könnä zemasetza und as het as Rezept für an Zaubersrank geh. Zum de braua, hend miar allerdings no zerscht müassa d'Zuatata finda. Zauberkrütti und Zauberpulver liggt jo nit eifacht so ufam Waldboda uma. Uf jeda Fall het üs de Trank bärastark gmacht. Nach am Mittag hend miar no as paar Spiili rund ums Huus gmacht: Ping pong, Volleyball, ds Lagerliad hemmer nomohl gsunga (dr Andreas het sogar amol uf dr Gitarra gschpiilt) und zum Schluss

hemmer no as riisa grosses Gemeinschaftsbild gmolt. Dr ganz Nomittag isch öppis gloffa. Für da Znacht hemmer üs alli ganz chic müassa aalegga. Denn hend immer as Meitli und an Buab müassa zema ins Esszimmer laufa. Döt sind aber kei Tisch meh gschtande, dafür isch Musig gloffa. Plötzlich het an Korka knallt und dr Champagner isch gflossa. Alli hend aagschtossa und denn het ma törfa dia beleita Brötli essa.

As isch uu fein gsi. Nach am essa isch plötzlich überall ds Liacht usganga und

miar hend müassa mit Taschalampa im ganza Huus go Wurzelmännli suacha. Dia hend üs Froga gschteilt wia zum Biischpiil: Wia heisst dr Wald vo Trans? Zell miar füüf Leiter uf, Säg miar füüf Planeta... Und denn hets endlich dia langersehnti Disco geh. Dr Björn, dr Thomas dr Christian und dr Sandro hend sogar no an Brakedance vorgmacht. Am halbi Ölfi sind miar denn alli todmüad ins Bett. Das isch würlklich an lessiga letschta Obig gsi.

Friitig

Miar hend uusgeschloofa, wega dr Disco am Donnschtig Obig. Nach am Zmorga hend miar d'Kleider iipackt und händ si abatreit in ligang. Denn hend miar d'Better abzoga und dr Boda gwüsch. Dr Sandro und dr Björn, sind zäma go d'Hütta abbaua. Alli andara Kinder sind vorussa no as bitzli umagschprunga. Spööter sind au sie no zur Hütta ufakoh go ufruuma. Schaad, si isch so schön gsi. So, und jetz sind miar alli zema am schriiba, was so alles in dera Wucha gloffa isch und do höcklend miar jetz halt... Villicht tüand miar denn nachher no as paar Spiili macha und heig go und z'frida sii!

